

**TAN SRI IR LIM HOCK SAN TERIMA ANUGERAH DOKTOR KEHORMAT OLEH  
UNIVERSITI ANTARABANGSA UNITAR**

---

**Putrajaya, 18 November 2023 –** Pengurus Eksekutif LBS Bina Group Berhad (“LBS”), Tan Sri Ir Lim Hock San telah dianugerahkan dengan Ijazah Kehormat Doktor Pengurusan di majlis konvokesyen ke-23 Universiti Antarabangsa UNITAR di Putrajaya hari ini. Anugerah ini diberikan kepada Tan Sri Ir Lim sebagai pengiktirafan di atas kepimpinan cemerlang beliau di dalam menerajui LBS sebagai salah sebuah pemaju harta tanah yang terkemuka di Malaysia, serta sumbangan beliau di dalam memperkasakan komuniti melalui penglibatan dengan badan-badan NGO dan juga reputasi beliau sebagai salah seorang individu penting di dalam jalinan hubungan dua hala Malaysia-China.

Selaku jurutera profesional dan profesor adjung di Universiti Antarabangsa UNITAR, Tan Sri Ir Lim Hock San menamatkan pengajiannya pada tahun 1982 dengan Kepujian Kelas Pertama dalam bidang Kejuruteraan Awam daripada ‘University of Wales, Science & Technology’. Sekembalinya ke Malaysia, beliau memainkan peranan penting dalam membangunkan LBS, yang telah diasaskan oleh mendiang bapanya, Datuk Seri Lim Bock Seng, sebagai sebuah pemaju harta tanah terkemuka di Malaysia.

Dengan pengalaman lebih daripada 40 tahun dalam industri pembangunan harta tanah, Tan Sri Ir. Lim berpengalaman luas serta berjaya menobatkan syarikat sebagai salah sebuah syarikat pengurusan terbaik di Malaysia, suatu pengiktirafan oleh Deloitte untuk tahun 2022-2023. Di bawah kepimpinannya, LBS telah berjaya mencapai kejayaan yang luar biasa di samping berjaya membina lebih daripada 40,000 unit rumah di seluruh Malaysia dan mencapai jualan melebihi RM 2 bilion pada tahun 2022, sekali gus mempamerkan prestasi kewangan yang kukuh serta penyampaian dividen yang konsisten kepada para pemegang saham.

Dalam ucapan penerimaannya, Tan Sri Ir. Lim menzahirkan penghargaan di atas penganugerahan Ijazah Kehormat Kedoktoran ini dan mendedikasikan Ijazah ini kepada

mendiang bapanya, Datuk Seri Lim Bock Seng, yang memainkan peranan penting di dalam mengemudi perjalanan syarikat.

Komitmen Tan Sri Ir. Lim bukan sahaja tertumpu kepada bidang perniagaan, bahkan beliau juga menggalas tanggungjawab sebagai Presiden Persekutuan Persatuan Hokkien Malaysia, sebuah persatuan kaum Cina terbesar di Malaysia. Selain dari itu, beliau turut memegang jawatan sebagai Naib Presiden Persekutuan Lim Malaysia dan jawatan-jawatan penting yang lain di dalam pelbagai persatuan di Malaysia.

Ijazah Kehormat Kedoktoran daripada Universiti Antarabangsa UNITAR ini membuktikan kepimpinan dan komitmen Tan Sri Ir Lim Hock San yang tidak berbelah bahagi terhadap usaha meningkatkan kecemerlangan perniagaan dan pembangunan komuniti.

-Tamat-